

四庫全書

集部

欽定四庫全書

集部

文忠集卷五十五

六

詳校官庶吉士<sub>臣</sub>李傳熊

主事<sub>臣</sub>呂雲棟覆勘

總校官進士<sub>臣</sub>楊懋珩

校對官學正<sub>臣</sub>李巖

謄錄監生<sub>臣</sub>任嘉春

欽定四庫全書

文忠集卷五十五

平園續稿十五

宋 周必大 撰

序四齋說

堂庵說

字說附

沈氏論語解序

揚子曰聖人之言遠如天賢人之言近如地易更三聖  
詩書禮樂春秋皆刪定筆削於夫子之手此聖言也孟  
荀楊韓發明經訓羽翼治道此賢言也兼是二者其惟

論語乎蓋齊家治國立身行道夫子平居形諸言者如  
三辰著明有目咸覩莫知所以明如四時運行無物不  
遂莫知所以行非天乎門弟子或求益或質疑往往指  
事而請譬之山川有定體高深猶可度草木有定形名  
物或可辨非地乎是誠五經之館鎔六藝之喉衿學者  
如欲時習聖人之言捨此何以哉吳興沈文炳字堯文  
家世儒者少有聲國學養親不仕惟留意於是書其子  
數抱遺編求予一言易不云乎仁者見之謂之仁知者

見之謂之知亦資道以盡吾之分而已其視作無益而  
攻異端者蓋相萬也嘉泰壬戌臘日

吳康肅公芾湖山集并奏議序

才氣可以任事而以學術本之未有不為名臣者也龍  
圖閣直學士天台吳康肅公以進士起家受知高廟爰  
及孝宗在內為御史歷吏戶禮刑少常伯給事中又嘗  
典治內史在外則五為帥守處劇繁以平易其才氣何  
待言至於履正奉公仁民愛物如嗜飲食發為詩文身

簪紱而心丘壑此則學術之力也其子嘉興太守洪裒  
公遺文號湖山集二十五卷長短句三卷別集一卷奏  
議八卷遠來謁序予與公同朝久知公熟公雖志在功  
名而議論專以恤民為主復躬行之自非才氣學術兩  
皆有餘何以臻此當乾道庚寅公帥豫章胡忠簡公邦  
衡以泉守予以閩憲俱入奏事過焉燕集欸甚將別各  
為二詞以送備載集中自是力請奉祠繼以掛冠享林  
下之樂者十有六年其詩詞益多意遠而辭達使人讀

之蕭然有出塵之想予嘗評論公侍從如嚴徐彈壓如  
趙張循良如龔黃止足如廣受凡西漢名臣殆可兼之  
然尚有一說始紹興甲子六月以祕書省正字輪對奏  
江浙昔號粒米狼戾雖歉歲斗值二百今歲豐反倍之  
蓋由州縣重征稅監官覬美賞巡攔利掊取若蠲其筭  
價自平矣高宗大喜七月有旨從之仁言之利其溥如  
此當路忌其直諒是月出倅括蒼予為祕書少監得此  
事於日厯厥後上用公執法主計豈徒然哉勅局編類

紹興寬恤詔令載之七十一卷之首例曰臣僚奏請當時士大夫固未知出於公今奏議復不載予故特書之以彰高宗愛民用人之美意且明儒術可當天下之大端云嘉泰三年五月日具位周某序

黃簡肅公中奏議序

子路問事君夫子曰勿欺也而犯之大凡誠動於內乃形於言一或欺焉雖復犯顏敢諫不足觀已端明殿學士簡肅黃公負正心誠意之學初奉廷對後為王邸教



官晚領儒宮貳祕書歷工禮兵部長貳兼給事中見於  
職守發為議論始終不叛所學其出使也金欲渝盟他  
人曰否公則先事言之其議禮也他人未免從權公獨  
據經守正當路或不悅而高廟深知之擢實侍從尤為  
孝宗眷禮故事近臣去國除職縱高鮮有過舊班者公  
以權尚書奉祠乃加直學士以寵之得謝之後遣使持  
親札訪天下利害朝政闕失進職祕殿加賜金緡公亦  
有犯無隱畢陳所蘊易箚之際猶手疏大事以聞事君

不欺蓋優為之既葬朱待制熹誌公出處甚詳嗣子湖北提點刑獄瀚復俾某序公奏議念昔接武禁塗目擊正論暨登二府恭聞孝宗評普安舊僚謂公莊重誠寔語不輕發當暑未嘗揮扇其恭如此他日枚舉二三名臣又以公為首併追書之以補家傳嘉泰四年正月

晁氏二圖序

紹興己未予年十有四侍伯父辰陽史君寓巔之壽量寺其西偏則晁公諱端規字夢規與弟端矩夢矩端準

夢準居馬他日夢規兄弟去予得其屋為書室見夢規  
大書滿壁皆勸世語嘗記兩句云緊緊勒回意馬勤勤  
把定心猿末云敢告諸人速生警懼今六十有六年其  
孫公定自筠寄公推本省身圖述一真所稟至一氣所  
成又有大學知歸上篇列道德教治刑下篇始於容而  
極於仁各為序論解累數萬言出入經傳間引釋老大  
要以脩身齊家治人為本至於朝聞夕死之道晚蓋有  
得非空言也惟晁氏文元公博學篤行兼通儒釋致位

禁林有子執政為本朝大家嘗著法藏碎金行於世年  
八十四考終不亂史氏極稱美之夢規殆傳家學歟嘉  
泰甲子二月辛丑平園老叟周某書

劉諫議諫稿序

故諫議大夫劉公諱度字汝一吳興人自為布衣修潔  
博習葉左丞夢得汪翰林藻皆以賢良方正薦旋第進  
士入為學官館職紹興三十一年夏汪中丞澈薦充御  
史遷右正言明年汪貳大政引嫌徙軍器監孝宗即位

復自宗正擢諫大夫前後上九十餘疏其子瑞金宰深  
之裒成上下卷以予嘗同僚請為之序其惟祖宗專任  
臺諫寄以耳目政事得失臣下臧否雖均許論議然諫  
臣因治體而及人才臺臣主彈劾而及時政其分職固  
不同元豐七年手詔曰近歲修復官政羣司各有職守  
右諫議大夫趙彥若侵越御史論事降一官左遷祕書  
監今公奏議心平氣和理正辭直薄物細故未嘗屑屑  
至於小大之臣麗於過失必隨事以言知設官之本意

或謂漢孔光上有問據經對不強諫爭懼章主過削其  
稿自後世觀之光果忠耶善乎蘇軾草諫官制曰進則  
詭詞退則焚稿衰世之事朕無取焉然則深之廣父書  
予序其書所以彰主聖也嘉泰四年月日

龍雲先生文集序

廬陵郡自歐陽文忠公以文章續韓文公正傳遂為本  
朝儒宗繼之者龍雲劉公也公諱弇字偉明居安福縣  
之龍雲鄉文忠薨於潁公方冠不及從之游然斯文未

喪何害為韓門籍湜也先是汴京及麻沙刻公集二十  
五卷紹興初予故人會昌尉羅良弼徧求別本手自編  
纂增至三十二卷凡六百三十餘篇惟公昔既不壽今  
復無嗣其姪孫上高尉希禹挹遺編而永歎嘉泰三年  
賢守豫章胡元衡平一表鄭公之鄉里訪襄陽之耆舊  
欲廣其書激厲後學予亟屬羅尉之子泌繕寫定本授  
侯刻之頃嘗與鄉人論公之文如南郊賦氣格近先漢  
已為泰陵簡擢詩書記序往往祖述韓柳間或似之銘

誌豐腴規摹文忠讀者可以自得至於才學出處具載  
李彥弼誌銘羅氏跋語皆月旦評之不可易者也嘉泰  
四年五月日

文苑英華序

臣伏觀太宗皇帝丁時太平以文化成天下既得諸國  
圖籍聚名士於朝詔脩三大書曰太平御覽曰冊府元  
龜曰文苑英華各一千卷今二書闕蜀已刊惟文苑英  
華士大夫家絕無而僅有蓋所集止唐文章如南北朝



間存一二。是時印本絕少。雖韓柳元白之文。尚未甚傳。其他如陳子昂、張說、九齡、李翱等諸名士文集。世尤罕見。故脩書官於宗元、居易、權德輿、李商隱、顧雲、羅隱輩。或全卷取入。當真宗朝。姚鉉銓擇十一號。唐文粹由簡故精。所以盛行。近歲唐文摹印浸多。不假英華而傳。況卷帙浩繁。人力難及其不行於世。則宜臣事孝宗皇帝。間聞聖諭。欲刻江鈿文海。臣奏其去取差謬。不足觀。帝乃詔館職裒集皇朝文鑑。臣因及英華。雖祕閣有本。然

舛誤不可讀俄聞傳旨取入遂經乙覽時御前置校正  
書籍一二十員皆書生稍習文墨者月給餐錢滿數歲  
補進武校尉既得此為課程往往妄加塗注繕寫裝飾  
付之祕閣後世將遂為定本臣過計有三不可國初文  
集雖寫本然讎校頗精後來淺學改易浸失本指今乃  
盡以印本易舊書是非相亂一也凡廟諱未祧止當闕  
筆而校正者於賦中以商易殷以洪易弘或值押韻全  
韻隨之至於唐諱及本朝諱存改不定二也元闕一句

或數句或頗用古語乃以不知為知擅自增損使前代遺文幸存者轉增疵類三也頃嘗屬荆帥范仲藝均倅丁介稍加校正晚幸退休徧求別本與士友詳議疑則闕之凡經史子集傳注通典通鑑及藝文類聚初學記下至樂府釋老小說之類無不參用惟是元脩書時歷年頗多非出一手叢脞重複首尾衡決一詩或析為二二詩或合為一姓氏差誤先後顛倒不可勝計其間賦多用負來非讀秦誓正義安知之云字乃負之省文以

堯韭對舜榮非讀本草注安知其為菖蒲又如切磋之磋  
馳驅之驅掛帆之帆仙裝之裝廣韻各有側音而流俗  
改切磋為効課以駐易驅以席易帆以仗易裝今皆正  
之詳注逐篇之下不復徧舉始雕於嘉泰改元春至四年  
秋訖工蓋欲流傳斯世廣雍熙右文之盛彰阜陵好善之  
優成老臣發端之志深懼來者莫知其由故列興國至  
雍熙成書歲月而述證誤本末如此闕疑尚多謹俟來  
哲七月七日具位臣周某謹記

送曾公薦赴省試序

漢制太常擇民十八以上上補博士弟子郡國二千石  
謹察好學敬長上肅政教順鄉里出入不悖者常與計  
偕永和曾生公薦年十有四已能修飭好書晝夜勤苦  
遂與儒先同上南宮視漢人年又少未易量也昔余與  
子中兄同乃祖季高兄弟四人俱試秋闈其後伯雲仲  
峻叔瞻相繼下世惟余兄弟及季高華髮相對今殆五  
十年矣因生錄示舉業求余一言既太息題其後又將

屈指計日俟太常籍奏之報舉酒明秀樓為季高賀慶  
元乙卯十二月旦前進士周某

送曾明發序

書曰非知之艱行之惟艱以孔子之聖猶謙其辭曰躬  
行君子未之有得是以孟子非苟知之亦允蹈之此聖  
賢事也近世士大夫乃謂人患不知若真知無不能行  
捨孔孟不信而感謝顯道張子韶一時之說以謂錦繡  
蒙陷穽人惟不知乃墮其中苟知其然將遠而去之嗟

乎以此勸中人以下使之勿習過惡入於坎窞可也若  
曰孳孳為善要當以升高為喻顏淵曰仰之彌高又曰  
既竭吾才如有所立卓爾人之進道必志於此陷穽云  
乎哉寧都曾君明發字見卓數攜贄求予一言予聞諸  
揚子見善明用心剛夫見善不明而徒剛焉亦流於惡  
而已矣既明於善然後苦其卓入道之序也君之邑宰  
傅子淵仕學兼優不崇空言嘗試以予說論其何如慶  
元丙辰八月二十二日

送黃伯庸疇若序

嘗觀唐三百年間文章鉅公如韓柳劉白及名世諸賢  
詩文兩極其摯學者不當置論其餘專以詩名者殆數  
百家求之他文間或勿稱兼是二美斯固難矣又讀班  
史傳循吏纔七八人皆良二千石蓋事任尊重則名寔  
相應今卑官也功德未孚於人況地有劇易才有短長  
故薛公治平陽則不足尹賞治粟邑則有餘換縣乃皆  
大治才之全者亦豈易哉豐城黃君伯庸為廬陵宰初



示予古律詩二百篇用意高遠屬辭清新摹寫物象莫  
能遁形繼出雜文一編時論正大古賦恢闔碑誌詳雅  
四六溫醇是可爭文士之衡矣他日謂予評之予曰邑  
附郡城地廣人殷姑置是事遲君政成已而見其持已  
以清撫民以仁聽訟以平決事以明租庸孔時百廢具  
興桁楊無繁弦歌有聲然後知君又可附循吏之名矣  
三載考績治行轉聞召節預頒趣覲朝廷於是鄉校之  
英旄倪之氓攀轅卧轍霧集雲蒸跬步莫前矧容嚴程

或曉之曰挽留賢令士民之情也樂與賢者天子之誠也君方以墨妙筆精而為華國之文推學道愛人而策濟時之勲奈何因德惠之可懷滯鳬舄之朝京乎衆始退聽車乃遄征平園老叟周某聞而嘉之而筆之非特紀寔贈行亦所以償夙心也嘉泰元年十一月七日

蕭人傑如寄齋說

太和蕭人傑即所居作如寄齋取蘇文忠公吾生如寄耳之句以自警丐予為之說蘇公博極羣書無不用之

事而波瀾浩渺千變萬化複語絕少獨此一句不翅八  
九用之訪張天驥子由淮和王晉卿次劉景文韻送芝  
上人王敏仲末年游鬱孤臺諸詩皆不易一字其他人  
生如寄何不樂之類尚未論也此理本出莊周記孔顏  
之問答以為世人直為物逆旅耳解之者曰不能坐忘  
自得而為哀樂所寄也魏文帝晉謝安輩始形於書詠  
於樂府至公然後表而出之其從官每以仁義為歸宿  
遷謫則遊於逍遙之墟食於苟簡之田立於不貸之圃

平生所得情見乎辭哀樂且不能寄奚暇問重複耶坐  
忘自得庶幾乎顏氏子矣蕭君其以是寘坐右有好事  
者示之母但寄傲南窓而已慶元二年八月二十八日

張德清悅齋說

邵武張瑩中字德清有志問學名齋曰悅屢求說於予  
老病久不報也至是其鄉人廬陵簿李子貴賢代歸因  
告之曰人必有羨於外斯有以悅於內自然之理也今  
夫口同嗜味耳同耆聲目同耆色三者必有物然後口

與耳目悅而好焉若心之所同則不然理與義而已二者非外也吾心亦內也故孟子云理義之悅我心猶芻豢之悅我口至於荀卿又加詳焉其言曰耳目鼻口形各有所接不相能也心居中虛乃治五官是謂天君其所以開導後人無餘蘊矣今子布衣蔬食皇皇四方就有道而正焉豈適為口耳之好哉是必理義之心油然而於其中可謂知所悅矣既以孟子發其端又因荀卿辨其名復以孔子之訓廣之夫學而時習固自可悅然必

切磋琢磨乃極其至故繼之曰有朋自遠方來不亦樂乎蓋知不如好好不如樂此淺深之辨也人能推義理之心常止其天君使好惡喜怒哀樂之情皆得其正則所謂顏氏之樂也內可勉而進彼紆朱懷金何足道哉

習齋記

永新歐陽邦基字壽卿才膽學富為善如饑渴嗜飲食其子宗闢齋家塾請予命名予曰論語首言學而時習之寔二十篇之樞要宜以習名併申其說夫天命之謂

性有時移於習故伊尹言太甲之初習與性成吾夫子亦云性相近也習相遠也學者可不謹其所習乎蓋習有是非習是則勝非習非亦勝是顧朋友講習何如耳  
嘉泰三年八月二十七日

周伯熊勤齋說

天運故健日月行故明水以常流故不竭人勤四體故無疾自然之理也上而為君克勤於邦下而為臣克勤無怠微而庶民勤則不匱皆是物也宗人伯熊字武伯

南城人進士登科佐邑安福屢求齋名請名曰勤而告之曰子欲學乎業精於勤願以韓文公為師子欲仕乎能勤有繼願以卻武子為法志苟立焉推而上之功崇業廣古人不難至也慶元四年五月七日

茶陵學林堂記

茶陵軍雖衡之附庸然地大多秀民登科者相望紹熙間譚君世選鏤廳第進士鄉人稱之猶子知言思繼其美築學林堂讀書著文曾不少怠其友谷若霖遠訪予



力求一言孟子曰脩其天爵而人爵從之惟能以仁義忠信樂善不倦相與切磋則公卿大夫且將馴致况一第乎不如是不可謂之益友慶元丁巳七月

楊光祖筠溪說

禮器論禮曰如竹箭之有筠正義以為青之見於外者聘義論玉亦曰孚尹旁達信也正義以孚尹為浮筠言其采色也夫有諸中必形諸外故江適竹賦云含虛中以象道茲非本乎曰有筠曰孚尹茲非文乎譬之於禮

忠信禮之本義理禮之文無本不立無文不行二者兼  
脩則貫四時而不易葉也宜矣同年楊謹仲清江名儒  
其孫光祖兄弟脩身嗜學力守家法華宗待制廷秀既  
大書筠溪以賁攸居予復推其義以勉之嘉泰二年五  
月十日

錢氏岵瞻庵說

待制錢公葬江陰之由里山其子廷玉等即塋築庵求  
名於平園老叟周某某為題曰岵瞻致不死其親之意爾

雅山多草木為岵無曰屺說文亦然獨毛傳相反正義  
疑傳寫之誤云嘉泰壬戌三月朔

書贈茶陵谷若霖

紹興初叔父靜江府君令衡之安仁與邑人谷槩世平  
善予年六七歲侍重親在焉尚能記當時事今六十五  
年矣而世平之孫若霖數自茶陵訪予廬陵予問越在  
隣邑之意其說有二祖娶茶陵陳氏陳氏有孫弁字令  
升力學好義葺城南書院榜其堂曰帶經招延名勝以

中表之故而館我一也邑儒譚君世選字勤之紹熙間  
鏤廳第進士有姪知言尤向學年方踰冠築學林堂讀  
書其中復以我為友二也予自念帥湘中者三年既不  
獲一至安仁訪童子之舊游又無由登覽二堂察大邑  
之風俗衰老懷舊安能忘情因君乞言為別書以遺之  
慶元二年十月十八日平園老叟周某序

書示臨川陳攜

臨川陳生以易卦推人休咎來求一言予於易固未能

學而休咎又非所問案間偶有正易心法及易索兩書  
遂以畀之心法出於麻衣道者其傳則希夷先生也讀  
之可以求天理易索吉之太和名士張汝明作讀之可  
以知人事二者苟盡心焉於休咎乎何有慶元己未六  
月辛未平園老叟周某某序

書示永豐彭肅

永豐析吉水為邑壤地褊小徒以歐陽文忠公故鄉且  
先塋在焉故士之力學好脩者衆文獻不絕近歲曾幼

度羅永年又以詩文為諸生倡殆欲家屈宋而人賈馬也幼度門人鄧傳之字師孟勤身勵志間復從師友於四方然用意深切故辭多刻苦永年有子曰煒字晦之天才雋甚父子自為知己出語輒驚人然有時乎悲傷予嘗憂其不壽已而果然今二子之友彭肅寬伯攜文過我學術開廣詞調清婉進脩不已致遠之器也昔七子賦詩可觀鄭志予雖無趙孟之識亦庶幾億則屢中云嘉泰元年正月甲戌

書贈安福劉儼子思

往年楊廷秀歎劉儼子思才名二十年躋場屋今又十  
五年未遇如初予安能知盡問諸嚴君平乎不然讀房  
千里骰子選格序為一晌之歡洗積年之滯可也嘉泰  
壬戌閏臘十月

書曾無疑匹紙

蘇文忠公素慕白樂天之為人蓋二公文章皆以辭達  
為主其忠厚樂施剛直盡言與人有情於物無著亦畧

相似樂天為忠州刺史作東坡種花二詩又有步東坡  
詩云朝上東坡步夕上東坡步東坡何所愛愛此新成  
樹文忠公中年謫黃州偶因築室遂號東坡居士嘗賦  
八詩其屬意有自來矣後為從官羨樂天口之不置如  
云定似香山老居士世緣終淺道根深又云我似樂天  
君記取又云出處依稀似樂天其他形於詩者甚多惜  
乎閒居二十年之志迄莫能遂黃門公不云乎子瞻之  
仕其出入進退猶可考也後之君子其必有以處之矣



慶元己未三月三日友人曾無疑出示匹紙為書此說  
書匹紙贈安福劉澈

紹熙辛亥十一月某赴官湖南道由安成劉偉子才投  
贈十詩有味其言後十餘年當嘉泰壬戌季春子才之  
子澈攜以相示又出子才雜詩一卷皆有待制楊公跋  
語是足增喬嶽之重矣澈也復以長書及二詩銜袖為  
贄予受而讀之既歎且喜歎者何也感歲月之邁惜子  
才之老也喜者何也劉氏三世俱以文鳴其興殆未艾

也會得匹紙為書頃所作西溪後序并子才十詩又錄  
二跋以遺澈餘紙甚長歸示鄉人必將贊先德而傳後  
學毋以羅趙在前遂不顧也二十日平園老叟周某記

書匹紙贈許玠介之

高宗初元首用襄邑許崧老為尚書右丞文章議論不  
待贊也今曾姪孫玠學有家法自衡州攜詩相過格律  
高深詞語清麗予手之不能置求一言以為別予素不  
能詩矧敢塗澤無鹽効顰西子乎適有匹紙輒書其樂

府四篇於卷首繼此得佳句請續於後軸滿復以相示  
更當刮目待阿蒙耳嘉泰壬戌三月二十四日

趙汝橙縣尉字說

皇諸孫汝橙字茂寔謂予花木無不結實於名為泛願  
更其字予曰橙佳果也雜見淮南子說文東觀漢記晉  
令風俗通博物志廣志異苑風土記上林蜀都揚都諸  
賦中所美者色香味而已至於形容其氣質韓孟為優  
城南聯句云鵲殼攢瓌橙蓋珍之也譬諸人則國之寶

也唐朝蘇瓌有子名頴字廷碩父子皆賢請合二美易  
字廷瓌斯不泛矣又有以勉君昔者汴京植橙禁中號  
為珍異仁宗召宗室及侍臣同觀於慈聖閣宋祁詩云  
帝憐秋實茂天許本根強又曰不隨江北化思助廟中  
嘗末云榮觀聳麟族賦筆助荷囊厥後英宗眷禮侍讀  
學士劉敞以其在告遣使賜新橙五十備載史傳君年  
方英妙當周以宗強之時悉心問學自取科第他日進  
修不已為國寶臣或預榮觀或拜珍賜廷瓌之義庶有

合哉嘉泰二年三月二十四日

蕭光字說

龍泉蕭光字煥之求字說於余孟子曰充實而有光輝之謂大充實內也光輝外也有諸內乃形諸外本朝司馬溫公名光字君實是也揚子亦云晦斯光夫惟侍立君子言可聽也禮可觀也自晦而光其光彌明唐杜如晦字克明是已既名光矣煥何加焉字曰晦之義意乃全詳說反約古人皆然咨爾君味孟子楊子之言思溫

公杜公之賢奉以周旋其永無愆嘉泰三年八月二十  
六日

姪孫顥字說

彥思姪三子長顥字晉臣慕陳顥也次顥字稷臣謂魯  
顥史也季顥乞字字圭臣能勿誨乎卷阿之詩曰顥顥  
昂昂如圭如璋大凡為人必以禮義切磋之使貌溫而  
氣盛如玉之圭璋然後有威儀焉有聲譽焉此所謂吉  
士也不然表裏砒砒人將汝玼顥其念哉嘉泰三年正

旦八叔翁書於明農堂

田炳名訓

郴州別乘田君貢甫之子阿章生九年而未名今歲冬至天子初郊貢甫格當任子將以名聞其羣從兄弟名皆從火有請於予予名之曰炳字以伯視揚子不云乎知其道者其如視忽眇綿作炳夫視大必自細視遠必自近舉目於此炳然於彼推而至於先知皆是道也童而習之常視毋誑及其長也克明顯光然後可以世濟

其美無負國家賞延之恩矣炳乎勉旃慶元三年

文忠集卷五十五



欽定四庫全書

文忠集卷五十六

平園續稿十六

宋 周必大 撰

啓 親書附

回潭州朱元晦啓 甲寅

推轂吳京開藩楚甸先聲久播美化即成惟朝廷急於用人而郡國艱於謀帥雖宸心加意乎簡擢顧物理有時而乘除積弊在前必得賢牧齊其政庸夫之後正須

真儒變其風自昔所同於今尤著恭惟某官奮百世之下得六經之傳聰明天分之高道義躬行之至宜論唐虞於廣廈乃煩羊杜於征南坐使湖湘立成鄒魯某三年佞儼萬事推頹賦陶令之歸幸諧素志推謝侯之去可卜輿情已荷匿瑕更勤削牘佩交成之厚德激愧感之深悰

回隆興趙子固鞏啓

又

兩辭鄉部之麾自知非據一用皇華之使咸謂當仁事

殊榮戟之遙臨人喜湖山之自得恭惟某官行推多士  
才過萬夫治聲久著於蜀門政術尤高于江右我思用  
趙振馬服之威名無以易堯契高皇之善任已寓文謨  
之直即聯禁闥之班俯眷衰疲曲貽緘翰珠簾盡揀莫  
陪坐上之賓藤杖芒屨方受部中之賜其為欣感未易  
名言

轉少傳致仕謝宰執啓

又

引年遂請已荷曲成增秩示恩益彰洪施衰悰易感厚

德難名欽惟國家度越載籍粵從選調爰暨大僚皆於  
休致之時被以陞遷之渥既昭邦典仍篤士風如某者  
初無一日之長幸際四朝之盛涼涼跼跼嘗恐蹈於鄉  
原暖暖妹妹敢自安於私說宛其老矣曷不歸哉人譏  
九棘之龐眉心慊四明之狂客奏章上徹俞旨下頒冠  
掛虎門岸角巾於東路車垂夏簑策徒步於南岡永全  
康鹿之生實出夔龍之造茲蓋恭遇某官股肱任重甄  
治功高推冕旒優老之仁為簪笏抽身之勸是令朽邁

不失光榮勇退急流雖前脩之或愧倒行暮日庶後悔  
之能逃銘佩在中敷陳奚究

回金陵張定叟尚書啓

乙卯

加職西清擁旄東府寬顧憂於南面憺威畧於北方惟  
今秣陵視昔洛宅眷懷先正開濟中興早歲鈞樞贊高  
廟定都之策暮年藩翰宣壽皇復古之威成功豈在於  
他門濟美必由於賢嗣蕭相運關中之粟已賑饑羸夷  
吾撫江左之憂更觀勛業事樞之執畧刻以須臾甫遂

休官豈應為佞敬酬來貺聊述興言晤語方遙傾依彌切

回洪單虞卿侍郎啓

乙未

臨遣近臣保釐方面古之督府今乃潛藩德化俶敷顧  
憂頓釋恭惟某官儒猷粹美政術通明論思早正於貳  
卿豈弟脩彰於六郡西江勝槩聊褰雲雨之簾南省清  
班即曳星辰之履豈應宅牧遂緩賜環某幸與農疇共  
棲宇蔭辱華賤之甚寵視朽質以增慚欣感交懷喻言

曷究

回隆興帥張伯子尚書啓

庚申六月

內聯禁直外領帥藩竊觀鼎族名世之英嘗受阜陵登  
畿之眷迨今選授抑有端由蓋烜赫舊都潛邸節旄之  
故在而岌堯新閣淳熙雲漢之昭垂兼而畀之榮則深  
矣恭惟某官端方全德博學名儒家傳忠義之規世濟  
直清之美再登朝路倍結宸知惟糾繩司國論之是非  
惟封駁係政幾之得失凡有志一時之士皆假途二者

之間望愈隆而人愈推公每進而寵每避既儀八座實  
通四鄰復屢控于封章竟斜飛于征鎮外有五長雖上  
法于周官入為三公恐難稽于漢制某睽違久矣庇賴  
在茲設榻東湖豈君侯之有靳迷津南浦歎病叟之無  
緣因酬誨賜之殷勤不覺感悚之忉怛

田潭帥趙待制不迹啓

辛酉

東浙名藩疊書課最南荆鉅鎮申界帥連湘水波澄嶽  
山勢重恭惟某官世傳令德躬稟異材詞章賀白之儔



譽望閒平之亞自結冕旒之眷獎徧更麾節之劇繁人  
云挾山超海之難公乃破竹折枝之易諺門候對已優  
踐于禁塗省坐論思即冠班于常伯某癭疴衡宇引領  
高牙昔者分携已越一星之久今茲掩惡尚煩五政之  
餘過勤盛禮之施殊愧前緘之簡其為欣感未易敷云

回豫章韓帥子及啓

壬戌

祥開鵲印命荷熊旂十國為連羣州承楷恭惟某官姿  
凝瑚璉之器家襲鼎彝之勛漢內史之居官以經術潤

色吏治周司徒之數典篤世忠服勞王家垂踐中臺即膺  
外間惟徽皇定尉安之府肇自政和而忠獻登齋戒之  
壇適當星變方上聖適追于前烈宜後賢復踵于先猷  
榮戟一臨軍民交賀相尊等耳聊冠武階公衮闕分即  
儀文陞某昔叨事契今齒部民姓名未洗于丹書牋翰  
羞塵于玉帳詎期厚禮首及陳人南浦飛雲目極滕王  
之閣東湖設榻夢遊孺子之亭欣愧兼深喻言徒費

謝陳提刑讜生日詩啓

解九夏之齋自知誤投於世網按中元之籍長生敢擬  
於仙曹未瞻使者之繡衣先拜美人之錦段妙甚唐賢  
之律申之使克之言何臺治之俶臨為部民而加禮歌  
明月之章於赤壁諒因歲日之俱同穆清風之誦於東  
方敬祝牡轡之遄返其為感詠交集襟臆

謝許監丞知新生日詩啓

與予同歲渠長壬戌一月

庚戌雌甲辰敢攀壽雋公瑾小一月適契吾宗過軫高  
情曲形盛禮賦兩詩而寵甚及二丙以欣然

論與其子  
檢法皆丙

予生來詩憶元豐壬戌之明年有潞公丙午之盛集今及二丙

幸密隣於几杖且陪高會於笑談頌咏攸深數言罔既

謝權守鄭通判臨生日詩啓

壬戌

解九夏之齋自知誤投於世網校中元之籍長生敢擬於仙曹荷邦君意重於岱嵩推家學文成於黼黻併勤饋遺疊致誦言贈我金錯刀增光篋笥報之青玉案徒愧砭砭悚感交懷喻言奚究

回陳正仲提刑賀冬啓

壬戌

登望闕之臺黃雲徧覆按屬城之獄綠草羅生盛哉穰  
簡之祥時乃平反之報恭惟某官螭階良吏虎觀鴻儒  
曼倩繡衣時當剛長晉卿愛日坐轉冬溫即遒四牡之  
歸不應一陽之復憶去歲茲辰之禮密近天顏咏明年  
此會之詩定陪郊祀方圖馳問已辱摛詞感與頌并意  
非言盡

又謝生日詩啓

癸亥

益州刺部固多中和宣布之歌魯泮獻囚繼有耆艾熾

昌之頌蓋仁愛素孚於郡國則歡謠交著於士夫蓋期  
德性之好謙反為部民而致禱寵之唐律薰以班香靈  
均初度之嘉走無是也魏野中元之句公則過之在愧  
感之俱深豈叙陳之能既

謝吳運使時顯生日詩啓

繼萊國而生已愧中元之句憶宣城之舊更驚四紀之  
年會華節之遄歸摛雅詞而下屬洛陽舊德不稱擬倫  
履道燕居幸同休退願歌赤壁共挹清風在欣感以交

懷非叙陳之能既

復少傅謝諸府啓

疵瑕久積灼然復玷之難造化密庸修若轉圜之易倍  
極輪囷之感熟窺坎北之垠伏念某資稟凡庸仕塵顯  
美居不思於特立動或蹈於妄行言路糾繩殆盈百謫  
宸衷涵覆止削一階未蓋前愆已仍舊貫茲蓋伏遇某  
官道高邃古勲在王家心同稷契之忠時際唐虞之盛  
好善優於天下何區區樂克之強若已納之溝中益切切

商衡之任助聖明之篤舊開老退之圖新遂使里居獲  
刊罪籍班通九棘阻瞻槐位之尊身托一枝自幸林巢  
之穩其為佩服固既敷云

回衢州章茂獻侍郎賀復官啓

又

掛冠久矣麗丹筆以猷新出綈綵然指青毡而復舊恩  
固由於舜禹助亦假於嚴徐茲蓋伏遇某官念氣類之  
同篤鄉鄰之好獻可替否每效論思之言嘔枯吹生更  
推獎譽之惠致冒雲霄之澤免貽田野之羞方欲馳辭



已勤貽問紆丈二之組望之將莅於左馮率三千之臣  
召伯行登於右相因酬嘉貺併致忱言

賀陳正仲提刑除職啓

癸亥夏

策勲劇部加職清廂計前日之班資合徑叅於義畫重  
公朝之名器猶假寵於文謨綸綍光華紳綏悅懌恭惟  
某官學高游夏文儷淵雲當直上於禁途尚斜飛於廉  
使吏民改觀欣康侯晝接之蕃旒冕注懷佇宣室夜前  
之席某素叨眷誼倍極懼悚手牘亟馳衷誠莫寫

又回賀綸審察啓

又

子能仕而教之忠每慙古訓賢在上而引其類首辱衆  
言未嘗學禮於孔庭乃許觀竒於漢閣此蓋某官昔聯  
中憲持論挺然今領外臺揚清銳甚既噓枯於屬吏亦  
借潤於陳人恐傷公舉之明尚闕私書之謝先勤慶問  
倍激感悚尚惟高明有以矜亮

賀陳勉仲拜右相啓

又

庭揚大號國拜中臺名世之生五百年時方際可太學

之興一甲子今乃得賢恭惟某官德業兼隆詞章獨步  
伊尹樂堯舜之道素蘊蓄于胸中韓愈視遷雄之才宜  
推尊于海內周旋二府啟沃九重甄治無心器方圓以  
各遂權衡有信物輕重以皆平茲專面以正朝益同心  
而輔政方且恢四維而厚士俗闢數路以收人才稷契  
臯夔固將踵武蕭曹丙魏豈必希蹤二十四考之方書  
前後數公之罕及其雖還初服尚托大鈞願偕沃壤之  
毗共樂熙臺之化其為欣幸罔罄敷陳

與楊廷秀閣學啓

二十首

回甲寅賀冬

朝登度雪之臺黃雲入望門領遊帷之觀白日自長雖  
節令之衆同在安榮而已獨恭惟某官道符剛長性察  
物成詞章添繡線之華聲譽振黃鐘之響時逢小至慶  
集大來某特辱摛詞更勤致饋仲尼百榼醕酣無底之  
清德裕萬羊厭飫有期之產中心積感多語奚殫

度雪臺在

楊秘監園中遊帷觀即玉隆宮  
楊所領詞無底清所送酒名

賀覃恩轉中大夫啓

又

聖主卜大橫之兆名卿夢中穗之禾汲黯常居是官以  
諫諍而外補神宗尤重此秩待疑丞之初除公比德以  
何慙上登庸其可必屬抱疴之未愈欲請問而不遑輒  
以懽悰寓之折簡尚需召驛別展慶儀仰惟高明俯賜  
鑒察

回賀入新第啓

又

市近囂塵賴景公而更宅書兼草隸荷外監之屬辭矧

茲蓬戶之居時乃棘闥之址當年附驥七十子之同升  
半世營巢三十年而始有念衆雋迄今而無幾幸兩翁  
相望以非遥倘因黃堂念蓋公之時就為雪舟訪安道  
之計殺雞為黍當傳荷蓀之芸鳴鹿而歌共話楊侯之  
舉其如感應罔既敷宣

回乙卯賀年啓

正次于王新天子一元之歲未加于郊外秘書三合之  
年方興運之鼎新宜多賢之泰內而況多文為富直道

而行博古通今重漢廷之經席危言讜論發晉殿之酒  
樽在故事以雖聞舍明公其孰稱即頒銀信遂度玉墀  
微贄攸陳竊幸鄉風之舉盍簪莫預遙思樾馬之喧惟  
是勤拳莫容殫叙

回乙卯賀冬啓

景占圭表應一丈三尺于牽牛注就韋編推六日七分  
于大象翕爾履新之慶萃于博古之儒恭惟某官溫厚  
足以破嚴凝剛方足以祛邪枉聲名遠播符廣莫之雄

風壽祉丕延同舒長之化日當芸荔挺生之際是絲綸  
誕布之時拾遺班北極之闕方膺異寵冢宰相闕壇之  
陞更祝後年某甫治書郵遽勤誨牘范盤中之金露醉  
德孔多饌天上之白羊屬饗何幸未酬盛禮姑致感悰  
尚冀台慈俯垂鑒察

賀除待制啓

丙辰

懇辭嚴召商賚殊褒旌東觀之儒先拜西清之閣老恭  
惟某官冰霜其掞金玉厥躬貫日忠言規模稷契凌雲



藻思步驟莊騷上自兩宮下通四海莫不哀窮而悼屈  
謂宜掇出以橫翔雖越冷熱撰而上征是名異數然歷  
大少蓬而次對誰可同僚豈持橐之無人獨起家為有  
耀詔札密封於泥紫服章光映於鞞紅朝廷鄉黨三備  
達尊已壯吾邦之觀宮職聲名俱歸詩客更追乃祖之  
風其心馳賀厦之成迹歎出門而凝念棘闈之宿契懷  
栢悅之深情手牘所陳心聲莫寫

遠迎啓

又

恭聞騎氣將遂敬關父老懽迎吏民距躍蓋一佛出世  
覩共快於爭先豈二人同心馬宜奔而敢後正以衣冠  
之掛難干簪橐之新在隱顯以差殊非禮文之簡怠高  
明所照悃悃何逃仰冀薰慈特加乎察

回丙辰年啓

歷紀火龍班高金馬齊耆英於溫洛信古來稀聯法從  
於甘泉從今伊始恭惟某官偕時泰年與德升妙論粲  
花春頓生於坐上仁風偃草冰潛泮於池中衆人望公

如西臺四時待公為玉燭必也重高門之地豈其遣青  
笠之心某占詞未成飛翰何速膠牙藍尾深思常侍之  
同新厯舊符竊起東坡之歎其為感詠莫既敷陳

回丙辰賀冬啓

南溪測景符周圭畫景之長東魯縱心測義易天心之  
復當兢辰而考古宜受祉以及今恭惟某官無心如迎  
送之雲觀化應舒長之日名叅禁路諒懷憶昨之班使  
總郊壇預卜來年之慶神人所相福祿其綏某已屏冠

裳莫陪簪履沐緘書之腴緝愧禮度之愆忘欣頌交深  
指陳曷喻

回丁巳賀年啓

頒正朔以示庶邦甫窺光厯即嘉平而數新歲已涉商  
正慶贊宜先馳辭敢後恭惟某官事隨時並德與年新  
漏水滴徐重繹泰亨之象篆盤香永賸哦元會之詩柳  
條况洩于召音花塢難牽于野興綵旗簇仗行趨濟濟  
之朝白獸發樽聳聽堯堯之論某銳欲勤東道之主深

恐致北山之移徒紆頌詠之情莫寫依歸之志

回丁巳賀冬啓

元后肇禋已受釐于宣室叢祠均逸盍扈駕于甘泉瞻  
南極之景長慶西清之福備恭惟某官仁心夙著剛德  
時亨律回解谷之陰人愛晉卿之日天時已至召節相  
催某拱聽先聲將臨近郭刺繡五紋之弱誰能閑驗于  
女工風流二老之強但願叨陪于賓燕其為欣頌罔究  
叙陳

回戊午賀年啓

彩勝金幡曾共漢朝之元會蒼顏白髮今齊絳老之疑  
年瞻室邇而人遙殆形留而神往敢期筦記亟治書郵  
恭惟某官德逐歲新名隨日起春風和氣坐銷客子之  
塵心御柳宮花難狀詞人之妙語佇俟深嚴之直參裁  
寬大之書某久矣游從茲焉間濶郊關相望莫陪真率  
于者英酒醢前陳乃幸屬饗于盛德其為感愧罔既敷

陳

回已未賀啓

一元歲之始漢頒寬大之書五福壽為先魯獻熾昌之  
頌當國家之圖舊繫年德之加新恭惟某官膏雨蘇枯  
仁風解凍徑三三而成趣時逢花柳之春卦八八而終  
篇繇應乾坤之泰即遄驛召遂押廷班某衰疾龍鍾絨  
書猶豫十漿先饋敢為列子之驚六鷁退飛竊鄙於陵  
之願其為欣賀罔究願言

餽歲小啓

已未

芳歲將除椒觴載舉盍簪喧馬恨阻勝游對酒愛鵝首  
蒙厚禮不腆牲餼用塵庖厨物雖微而誠在焉施已豐而  
報何有尚蘄容德未置大何

賀致仕啓

已未十一月

掛冠神虎錫馬康侯職在紫清榮陞四等扶參黃散優  
進一階詔綈光華搢紳歆艷恭惟某官直方如伯起清  
約如公權準易有執戟深湛之思為文無盈川輕薄之  
體具今古之全美震華夷之盛名延登可期勇退何果



風月三千首重繼翰林休閒二十年定追洛社蓋意新  
者寧拘齒宿而德邵者常在年高優哉游哉休矣美矣  
見古人而一笑時揮霍禁之金通大道以三盃日飲螺  
岡之酒某游從最舊出處頗齊前進士同稱猶記曲江  
之宴故相國相過任從醉尉之呵願言俾壽之昌永作  
斯文之重

賀已未冬啓

子月四時之首周得天正黃鍾六氣之元漢為律本惟

昔重陽剛之復茲今宜賢德之亨共惟某官道與時行  
福同晝永浩養激葭灰之動文衡量圭景之長砌下芸  
生記蓬山之舊長隴頭梅放兆鼎寔之終調戲藏陰壑  
之水閒嚙晴窓之日甫也懷兩院吟五更三點之篇牧之  
勉阿宜祝十紙一箱之讀某未作南溪之泛先勤北海  
之尊數九九而哦詩自憐午瘦辦多多而有酒驟覺冬  
肥欣感交懷罔既敷陳

賀庚申年啓

百二十日而為春喜重添於閏月億萬斯年而啓運慶  
五值於初元阻陪後閣之賓遙致先盃之上恭惟某官  
氣調玉燭膏潤青陽聿來嘒嘒之祺胥樂熙熙之衆柳  
催槐泛記絲光日彩於東宮珮解簪抽想名號風儀於  
西洛顧夙契時中之道盍起趨大內之朝亦惟舊人共  
政之圖歸趨新年太平之賀某居慙老伴每辱先施出  
丙入丁幸附壽星之次乞漿得酒載欣申歲之臨頌詠  
攸深指陳曷喻

賀郊恩進開國侯用子封通奉大夫啓

甲子

文帝席前爵錫通侯之貴魯公拜後陞陞三品之崇賈  
惟家國之榮何但鄉閭之慶某幽憂所萃贊喜弗先徒  
深羨慕於再三姑述悃誠之萬一

又賀增秩晉爵啓

恭審秩漢皐衣執周穀璧彰前旒之念舊煥疊組以俱  
新行下蒲輪立登槐位某杜門衰絕賀履邈綿敬布懼  
悰仰祈炳鑒

謝臨慰啓

甲子

內助云亡外姻未至首紆緹騎遐顧素帷既陳德人一  
束之芻復枉子舍三株之樹屬櫻纏於拙恙阻推謝於  
高閎救民有喪公不愧谷風之什刺人無禮走奚逃相  
鼠之譏姑候痊平之時自歸臯緩之罪謹令賤息先布  
忱言仰惟台慈俯賜澄察

回蕭郎中親書

壬戌

渝川螺水密聞雞犬之聲樞筦鳳池憶送夔龍之集繁


夙隆於雅契盍肇講於嘉姻茲承親家國史大著郎中  
長令似監倉承事業茂清脩稱玉筍神仙之裔而其長  
孫女十七娘性存柔順知召南法度之循敢緣聲氣之  
同妄意琴瑟之好遠勤厚禮有華用雁之儀何幸宸悰  
將竊乘龍之寵不腆回幣具如別緘

與胡季解求親書

又

託契先公嘗逋禁林之宿依仁大族久陪鄉社之游將  
為徵福之圖輒致求婚之請伏承親家通判左藏第三

小娘子婦儀夙著有采蘋南澗之恭而某姪承事郎新  
監隆興府苗米倉某家訓粗遵無坦腹東牀之傲飭行  
人而聽命資薄幣以馳誠劉范世姻庶益堅於永好崔  
盧門戶尚何假於他求不腆之儀別緘具載



文忠集卷五十六



欽定四庫全書

集部

文忠集卷五十七

詳校官庶吉士臣李傳熊

主事臣呂雲棟覆勘

總校官進士臣楊懋珩

校對官學正臣李 巖

謄錄監生臣任嘉春

謄錄監生臣黃嵩齡

欽定四庫全書

文忠集卷五十七

平園續稿十七

宋 周必大 撰

謝狀

謝顥守賀生日狀

老逢初度彌追感於親庭誼篤鄰居乃寵貽於樂府粲  
然新句貴此衰蹤調周雅之清風永懷何已歌楚人之  
白雪寡和固宜

謝寄居通判賀生日狀

丁巳

老而不死方永慨於劬勞愛之欲生乃曲形於褒借穆清風而作誦祈黃耆之維祺粲羣玉於西崑病眸空拭鏘大鏞於東序俗耳彌驚愧感交懷敷宣罔既

謝路鈴路分

又

生我劬勞方切蓼莪之感錫公純嘏過勤黃髮之祈高誼重於丘山正聲諧於金石穆清風之誦固知鴻筆之有餘投明月之珠所愧衰蹤之勿稱但深銘佩莫究叙

陳

謝憲司提幹檢法贛州路分將官教授五人共

一詩

壬戌

特紆厚意遠記賤生合六律以諧聲粲多儀而設醴自  
慙朽邁曷稱吹噓惟傳存與獻之規且禮著往來之訓  
紅羅不腆聊資碧線之抽綠綺甚華殊乏南金之報其  
為感荷罔既敷陳

謝邵英德之綱生日詩

以沉香并英石為壽  
賦詩

分奇芬於海上已薰班氏之香列遠岫於窓間更詠謝  
公之句有華二美來壽一夫惟愧感之交懷豈叙陳之  
能既

謝李賀州綢生日詩

癸亥

老矣無能豈初生之尚記粲然有接何舊好之彌隆形  
妙語於篇章列多儀於香幣三復頌言之美載深悚感  
之懷

謝贛州齊發判天覺生日詩

癸亥

月宿南斗偶類韓公之生誦如清風過勤吉甫之作顧  
乘除之何有視碩好以多慙循正則之名方悲初度致  
敬恭之幣姑藉未將感悚交懷敷宣罔既

謝贛州路分主管提幹檢法教授生日詩

又

竊以負之六射悵永感於顏齡作者七人辱聯成於傑  
句嘉果饒牽而侑酒妙香庭燎以祈年為禮既豐寄情  
良厚降非正則方慙初度之名實在敬恭聊假未將  
之幣其為悚荷罔既敷宣

謝鄭通判臨生日詩

又

靈均初度之名久茲永感魏野中元之句富矣嘉言正  
深饋鯉之悲乃屈屠龍之筆海沂康矣盍歌別駕之功  
吉甫穆然反辱清風之誦中彌積愧倒置多慙

謝黃經畧王南劍鄭通判徐提幹生日詩

又

揆嘉名於初度每感劬勞生上相於中元敢希賢哲荷  
高情之繾綣形善頌以殷勤歌明月之章已窺藻思穆  
清風之誦更滌煩襟欣感交懷敷陳奚既

致仕謝守倅寄居

乙卯

特勤枉駕俯慶垂車俶掛衣冠阻趨榮戟其為愧感罔  
既敷宣

謝楊守門送上塚啓

丙辰春

竊以岳牧下車將禮神而夙駕州民上塚乃飛蓋於晨  
門佩謙德之加隆激懦衷而增愧

謝趙守門送

闕

歲時掃墓是為闕老之常車騎塞途乃屈邦君之重不



遑拜辱但劇懷慙

慶禮賜粟帛謝太守

已未

特枉前驅敬宣上賜昭二聖交歡之慶示九重優老之恩榮幸良深敷陳罔既

復少傅謝監司

癸亥正月

某祇奉新綸寵還舊秩赦過宥罪仰自聖君之仁噓枯吹生外由膚使之助緘書先暨感臆增深

益國夫人喪謝守倅

甲子

自頃悼亡迨茲送往叠勤芻蕘仍製薤歌前驅遠出於  
郊關厚禮倍光於阡陌永言感愴難盡敷云

謝黃侍郎艾遠迎

丙辰秋

茲承厭直禁嚴出臨征鎮接壤喜瞻於法從齊民諒偃  
於德風屬此病衰阻於庭謁先勤告至倍極馳情

謝趙守遠迎

茲審九重臨遣千騎鼎來屬得謝以里居阻爭先於郊  
勞其為企詠難盡名言

謝孫侍郎逢吉遠迎

茲審榮剖竹符暫歸梓里屬緣老病不獲攀迎先辱惠  
音第深懷感

謝監司遠迎

茲承使節行按屬城方掛朝冠阻于賓謁其為企詠徒  
劇襟懷

又

茲承肅持使節行按列城屬當退屏之時阻快爭先之

觀其為愧悵罔既敷宣

謝張憲行郡遠迎

茲審奉詔按刑揚帆及境既阻爭先之覩首勤告至之  
文愧感良深喻言奚究

又

恭聞使艦行按列城屬以抱疴阻於納謁先勤告至第  
切感悰

又

茲審衣繡詳刑揚舲按部屬緣拙恙阻造行臺愧企良深敷宣罔既

謝葉憲遠迎

茲審某官肅振使華按行封部屬養疴於私第阻納謁於公門懷企交深敷宣罔既

謝葉憲改江東遠迎

茲審某官寵膺新節榮歷舊封雖快覩之未遑喜先聲之已至其為欣企罔罄敷云

謝新贛州張舍人貴謨遠迎

茲審其官榮擁使旌經從鄰壤雖不遑於迎謁尚有幸  
於披承先辱緘封倍深感臆

謝前廣州趙帥時逢遠迎

茲審力辭間寄歸奉內祠屬以卧疴阻於造謁先勤惠  
翰倍切感悰

謝林侍郎大中被召遠迎

茲承顯膺召節已及近郊屬以卧疴阻於造謁其為瞻

企未易敷陳

謝胡侍郎紘遠迎

壬戌秋

茲審報政番禺領祠廬阜望鳳姿而在邇想鷁首以馳  
情先辱惠音倍深懷感

謝訪及狀

謝太守楊秘書方初到訪及

丙辰

竊以簞壺填道俶褻刺史之帷轡蓋及門首訪野人之  
室荷撝謙之有甚念徃拜之無從愧悚交懷敷宣罔既

賀禮尚

丙辰春

茲審寶龜獻兆銀菟分符條教一新士民胥悅屬櫻荷而掃軌阻挾刺以登門欣頌攸深名言曷既

再謝訪及

茲承涓選剛辰肇開盛府自惟野老燕賀厦以末由誰謂邦君雁及門而至再深認執謙之德難逃失禮之譏感與愧并意非言盡

謝楊守任滿訪及

丙辰



初聞解組便合曳裾正慙膂力之愆反辱高軒之過其  
為感激未易敷云

謝趙守除廣東憲訪及

茲承榮解舊麾光膺新節特勤寵顧倍激感悰

皇子誕生謝守倅訪及

恭以元子誕生普天賴慶先勤寵顧倍激懽悰

謝俞漕訪及

茲承升華內閣易節外臺寄委益隆士民交慶特勤寵

顧倍激懽悰

趙守謝批考訪及

茲承已書上考行踐中臺阻慶黃堂特勤阜蓋其為欣  
感豈易敷云

鄭倅權州謝雨訪及

竊以一雨隨車方謠甘澤雙旌枉駕更誦清風佩謙德  
之有加激感悰而無數

倅交印訪及

茲審涓辰洗印決境均懽已挂朝冠阻趨公屏其為欣  
感交集襟悰

又

茲審涓辰惟吉洗印云初坐阻造門首勤迂趾永言欣  
感交集襟悰

倅交割訪及

茲承榮解印章寵臨蓬華感執謙之過厚愧修慶之末  
由

又

茲承貳政成功四民交慶阻修漫刺特辱冰銜愧感交  
懷敷宣罔既

路鈴交割訪及

茲承撰良洗印擁騎過門屬以抱疴阻於展慶其為欣  
感罔既敷宣

路鈴交割訪及

茲承榮解印章言歸殿陛冰銜寵逮感臆良深

又

茲承倣解印章將趨環衛責存斯厚欣感交懷

倅權郡訪及

茲審譽高半刺榮領左符坐阻造門首勤飛蓋其為欣  
愧交集襟臆

又

茲承就領郡章阻于賓贊特勤寵顧但極感悰

又

茲承榮綰州符益隆德政阻于賓謁但劇懽悰

又

茲承已合左符尚分半刺時勤寵顧倍極懽悰

太守謝送生日訪及

竊以弧矢四方尚缺生申之慶弓刀千騎坐勤訪戴之  
謙愧荷交懷名言奚既

又

竊以神嵩生甫大昴降蕭豈惟藩翰之良是乃邦家之

慶阻奉千齡之酒先勤七寶之茶更屈顧臨彌增感頌  
丁守謝諸司薦訪及

茲審諸臺列薦總計明揚方遲召節之頒先枉使旌之  
過其為欣感交集襟臆

趙守轉官訪及

茲承策勲螺浦增秩潁川未展慶儀先勤盛禮其為欣  
感未易敷云

趙守除利路憲訪及

茲承著龜習吉符節交輝阻慶賓筵第深慙志

趙守子過省月望訪及

茲承鯉庭得雋龍節增華適當既望之辰過沐先施之禮其為欣感罔既敷宣

郊赦守倅訪及

吉土肇禋普天賴慶首勤寵顧同激懽悰

丁守被召訪及

欣聞嚴召阻綴賀賓首辱顧存倍深悚感



湯倅轉奉議郎訪及

茲審議郎博士已陟朝班除書德音即裁帝制禮勤左  
顧感極下懷

楊待制訪及

一掛朝衣久停賓謁杜門幽屏垣短難於自踰擁騎光  
臨鞭長有所不及倍感眷存之意賸裝愧栗之懷

楊閣學訪及

茲審璇宮鳴玉榮超學士之班寶帶兼金寵厚儒臣之

禮賀厦未容於亟往御風已辱於來游快觀爭先雖有  
披雲之幸殿奔恐後寧無策馬之慙

贛守張舍人訪及

時屈隼旃阻瞻鵠首雖抱樂且有儀之喜實慙來而不  
往之非其在感藏曷勝言喻

黃漕訪及

茲承榮持使節倂拜除書持枉芳銜阻於賓謁其為愧  
感未易敷陳

黃經畧得祠訪及

茲承穆卜辰良俶均祠逸禮勤左顧感劇中藏

彭常德轉官訪及

茲審奉十行之詔冠六品之階言念衰疲阻修慶謁先  
勤寵顧第激懽悰

又轉朝議大夫訪及

茲承榮遷元士特枉芳銜屬以抱疴阻於造謁其為欣  
感未易敷陳

又轉中散大夫回狀

茲審詔頒宸扆階正卿聯屬以卧疴阻於修慶特勤榮  
問倍激懽悰

謝廣州胡侍郎絃訪及

曲荷台慈俯臨陋巷倒屣喜瞻於芝宇曳裾阻詣於蘭  
舟愧感交懷敷宣罔既

旦望謝訪及

謝守倅正月望訪及

竊以鶉火中星蠶稿泛粥牙旗穿市雖暫輟於鰲頭御  
宴傳相行進陪於班首曲荷顧存之厚就伸頌詠之私

三月旦

竊以告朔惟時宜民介祉屬養疴於私室阻修慶於公  
門頌詠良深敷宣罔既

三月三日

是日初送新火

竊以月紀季春燧首鑽而始暨日逢上巳水未禊而先  
臨念賓謁之無階宜感悰之有甚

四月旦

竊以節紀天祺氣迎夏令當公儀之疊講乃私禮之交脩其在感藏若為鋪叙

又

竊以清和應候適當告朔之辰豈弟宜民丕受對時之社末由趨慶第切馳情

望日

竊以日臨甲子月滿望舒推豈弟以宜民對清和而介

祉禮勤左顧感極中藏

五月旦

竊以日永公堂喜來登於農黍風薰廣殿期歸和於帝  
琴念慶謁之無從辱顧存而有愧

又

竊以日永慶霄律中莖賓之朔風薰樂土福歸慈惠之  
師屬以抱疴阻於脩謁其為頌詠罔既敷陳

六月旦

竊以律應林鐘慶歸良牧屬緣老病阻造公門頌詠殊  
深敷宣罔既

七月旦

新秋倣屆阻瞻召伯之棠舊好彌隆持枉魯侯之駕敬  
佩謙勤之意交深感忤之懷

八月旦

竊以蟾宮生魄熊軾停驂屬此負茲阻於倒屣仰銜眷  
念俯劇感慚



十月旦

竊以良月應時真賢受祉屬緣老病阻造公門頌詠徒深敷宣罔既

十一月旦

竊以開藩浹月肇新視朔之儀飛蓋凌晨遠紹顧廬之誼莫遑造請徒劇感慚

十二月旦

竊以商正奮若秦臘嘉平黃冠正賴於蜡賓臬蓋特勤

於熊軾其為感愧罔罄敷云

十二月望

竊以嘉平既望春意將回阻講慶儀第深善頌

冬年臘雪立春訪及狀

年節太守訪及

竊以月正元日春王三朝瑞先舜牧之班珍奉漢京之  
貢阻陪掾史祇造廂營但深欣頌之懷莫究願言之素

又

竊以象測璿璣斗柄肇回於蒼陸氣調玉燭春風初入  
於東郊慶良牧之履端對昌辰而受祉阻於賓謁徒致  
頌言

路鈴倅寄居訪及

竊以歲時肇始品物咸新宜集殊禧式符交泰屬緣掃  
軌莫獲造門頌詠良深敷陳罔既

太守冬至訪及

竊以衛兵森戟盛陳亞歲之儀野服黃冠莫點初筵之

客方展公函之慶已勤都騎之臨感愧交并名言難盡

又

竊以衛兵盡戰有嚴亞歲之儀野服黃冠莫點初筵之  
客遙致錫還之祝允符來復之占謠頌所同敷陳奚究

又

竊以黃雲在望何勞魯觀之登白日初長已著晉卿之  
愛諒丕膺於祉福即歸踐於禁嚴屬此杜門阻於叩謁  
徒深頌詠莫究願言

又

竊以潛陽復筦踐小至之昌期陰德及氓膺大來之多  
祉況績閱素高於朝寧而考功屢奏於民庸願承天地  
之心即上星辰之履阻陪賓席但激懼悰

守倅賀冬

比逢國故茲值陽新阻脩亞歲之儀但祝自天之祐頌  
言斯至宣述奚周

倅冬至訪及

竊以潛陽復筦愛景延圭豈第久孚祺祥允集屬養疴  
於私室阻挾刺於公門頌詠攸深敷陳罔既

又

竊以潛陽復筦欣逢小至之辰荒徑荷鋤阻致大來之  
慶其為欣頌罔既敷宣

又

竊以愛日踐長吉人介祉禮勤左顧感極中藏

謝趙叅議賀冬

竊以潛陽復煒欣逢小至之辰衰疾負茲阻致大來之  
慶先勤華翰備諗撝謙願承天地之心永受子孫之養其  
為欣頌罔既敷陳

回太守賀臘雪狀

竊以春元將屆頒銀信於嚴宸臘雪先飛留金穰之大  
惠未展黃堂之慶乃勤皂蓋之臨愧感交懷敷宣罔既  
又

茲以臘雪應期豐年兆瑞臨存甚寵欣感交懷

又

茲以嘉平紀月微密應期阻造梁園首臨袁戶其為欣  
感未易敷云

謝太守立春日訪及狀

竊以下寬大之書初行春令底循良之績即慶璽書過  
辱顧存第深頌感

又

竊以芳春甫屆瑞雪先飄諒和氣之素充致嘉祥之併



集特勤迂顧倍切欣榮

謝楊守方移厨狀

竊以白屋始開許携於佳醞黃童爭看共掃於漁磯永  
言眷待之殊倍切感慚之至

又

茲者特飾行厨首陪式燕設一宿之醴良愧穆生合五  
侯之鯖更慚樓護不遑徃拜徒切歸仁

又

竊以秩衛武之初筵儀方抑抑設穆生之甘酒禮過區區枉竹裡之行厨轉茅簷之冬日其為愧感罔究名言  
謝上元移厨

特枉行厨許陪坐席煥華登於俎豆加餘惠於輿臺念  
往拜之不遑第懷慙而無已

又

竊以居類少陵鋤江頭之草逕禮加嚴尹簇竹裏之行  
厨有華白板之扉無愧黃樓之會永言謙施倍激感悰

權守移厨

託粉榆之社未展必恭近萸菊之辰先勤致敬有華車  
從預戒食期雖盛禮之難當顧清談之願聽惟慚飯顆  
莫稱侯鯖坐深愧感之懷仰冀融明之照

權守開樂移厨

久辱鄭莊之眷置驛馬以請賓今歌衛武之詩設鼓鐘  
而飲酒愧非有名之士輒當初秩之筵禮遇滋隆感慚  
交集

謝移厨後訪及

竊以枉駕肆筵已慚盛禮飛綏三顧尤佩勞謙阻脩下  
客之恭但積中心之感

又

疊枉旌幢寵臨蓬華既屬饜於盛德仍敬佩於勞謙往  
拜不遑懷慚滋甚

又

竊以獻南岳之朝正慙鼻祖置長安之驛幸際耳孫既

莫稱於百遘復屢勤於千騎茲為感悚豈易敷云

丁守移厨

茲承驛召鼎來未陪偉饒隼旗狎至先啓華筵愧感交  
懷敷宣奚既

趙守移厨

時勤車騎光賁草茅醕設穆生厚甚元王之意饌移嚴  
尹缺然杜老之歡感愧交深敷宣曷既

十月移厨

竊以冬日破寒已賴晉卿之可愛行厨治具更勤蜀尹  
之交歡所愧西都之賓莫酬東道之主寸心易感尺牘  
難周

謝趙守相過賞花

花開紅紫已賴春風穀駐朱丹特勤都騎無杜老交歡  
之萬一辱淮陰肯過之再三感愧兼懷敷陳曷喻

答趙守投謝狀

野簌山肴期摻思人之袂繡衣金節坐勤銜袖之書愧

感交懷名言莫盡

趙守移厨

茲承已拜使華未伸餞禮先勤治具益厚交情感愧於  
中敷陳奚既

鄭倅權郡移厨

原闕

謝訪別狀

謝楊守方任滿訪別

竊以黃霸再臨人俟八年之久仲尼既用政成期月之

間何統鼓之興歌已驪駒之趨駕自愧垂車之老阻陪  
卧轍之叱悵恨于中喻言曷究

王倅淹任滿訪別

茲承監州底績解印還朝屬此屏居阻于祇餞過勤別  
刺倍極感悰

張憲刻行郡訪別

特枉使車寵貽別刺屬養疴於蓬戶阻祇餞於津亭愧  
悚交懷敷宣罔既



彭守漢老赴常德訪別

茲承之藩卜吉擁騎告行方事藥囊莫陪祖帳其為感  
愧罔既敷陳

斛倅僖赴調訪別

茲承入朝天闕訪別草廬久抱微疴阻陪偉饒其為悚  
感罔既敷陳

趙憲善鑄赴利路訪別

茲承叩邾叱馭欲繼昔賢驪駒在門莫留去轍載披別

刺祇動離情

梁守京奉祠訪別

聯事熊相嘗託子孫之契持麾螺浦幸依父母之邦承  
歸奉於真祠阻追參於偉餞其為悵戀罔罄敷宣

湯倅璫任滿訪別

竊以邦國不空功成別駕驪駒在路歌動諸生坐深賀  
下之情行聽留中之詔特勤營從倍激感悰

胡侍郎紘經從訪別

瞻烏在岸禮已闕於將迎浴鳳於池勢方殊於隱顯三  
復氷銜之辱載深芒背之慚

文忠集卷五十七

欽定四庫全書

文忠集卷五十八

平園續稿十八

宋 周必大 撰

記一

賞心樓記 一名東樓

二水中分白鷺洲李翰林金陵詩也今白鷺賞心二亭  
連延城上元豐中蘓翰林賦長短句送王勝之仍題柱  
云江山之勝傾想平生名遂傳於天下廬陵亦有白鷺

洲青原臺直其首郡治也堆勝樓當其腹駟舍也登臨  
勝槩雖亞金陵然非閒人所能至盡求之於造物之無  
盡藏乎乃市民居創小樓介於二者之間借其名曰賞  
心且少陵江樓詩也衡不盈三丈縱又去其一惟費省  
故成速蓋洲之項領也目力所及視青原堆勝十得八  
九而無厲禁可以日涉詩不云乎于胥樂兮願與鄉人  
共之安知來者無二翰林之才為余賦之也慶元元年  
二月日

蜀錦堂記

予以紹熙甲寅十月遷新第蓋本郡貢院舊基也東偏  
買園數畝地勢坦夷名之曰平種海棠數百株蟠根老  
榦強徙以來中為堂三間南向重簷承雷東西兩榮弗  
陋弗奢明年花開如錦繡予與十餘客縱目其上皆問  
何以名堂予曰未也客試名之或曰公昔以布衣舉送  
此地今官一品而居之非錦衣畫行乎予謝曰此安陽  
韓忠獻公故事君母戲我客又曰公嘗以天子命兩帥

鄉部縱避忠獻豈不如朱買臣則又謝曰子惟不才不敢以引綬為榮四年之中再命而婁辭賴聖恩從欲許以銷印亦非買臣比也衆客於是合辭曰公昨蜀土于今三朝花滿錦城分派茲園倘不欲自比前人盍以蜀錦為名上因寓公下指花耳公意何如予謝曰客既合辭予則無辭乃不果辭慶元乙卯三月望

安福縣重修鳳林橋記

造舟為梁文王初為西伯創物之智也人到于今賴之

漢儒著爾雅乃曰天子造舟諸侯維舟大夫方舟士特舟庶人乘桴是說也謂辨尊卑可也河橋何與焉郭璞既誤以周公之言孫炎又從而為之辭其失詩雅之旨遠矣古者郡邑大率瀕江浮航于水加板其上聯屬綿亘以達于岸人之往來其道如砥視招招舟子爭濟于風濤之中險易勞逸蓋相萬也安福壯縣江西湖南之要津水出瀘溪匯于鳳林其廣三百尺是橋不知起何時姑以近事考之元豐縣令上官公頴崇寧縣令上官



合增脩于二十年之間邑士歐陽安稷名橋曰上官者  
從其姓也紹興庚申令韓邦光復脩之鄉先生王公庭  
珪名之曰鳳林者因其地也淳熙丁酉令徐輝又脩之  
邑人劉浚易名濟川則諂矣夫一橋在北門繞百餘年  
四脩而四壞何也吏惰財殫葺不以時或葺矣勿良於  
工故易壞也慶元改元令施廣厚適逢其壞而尉陳章復  
能委身任責相與掄材二舉大舫而新之治鉄為綆紉  
竹為筴圖惟悠久之計士民咸出力相其復起於季春

成於仲夏會太守楊侯方新至首助錢十萬仍歲留征  
商送州之餘為後日營繕之備章吾故人子也請記其  
事于今累月行授代去矣安得不為一言夫利涉之功  
微公家不能成雖成必壞者物理之常也郡邑無終窮  
守令有更變坐視勿恤其壞也速未壞亟葺其費也省  
今令尉幸舉職二千石又設儲待其慮周矣徒法不能  
以自行顧嗣音者何如耳因為辨漢儒之失揭鳳林之  
舊使後之人知公家之利非一族所得私若濟巨川非

一令所當擬必也即渡名橋隨壞隨葺乃百世不易之道也二年三月十五日

廣德軍重修譙門記

天子五門諸侯三之禮也綿之詩曰廼立臯門臯門有伉廼立應門應門將將是時古公居岐為商諸侯故鄭氏箋云諸侯之宮外曰臯門朝曰應門內有路門天子加以庫雉其義昭然是儒釋爾雅亦引周禮注天子諸侯同此三名惟毛氏因戴記明堂位言魯以庫門為天

子之臯門雉門為天子之應門遂謂天子郭門為臯正  
門為應而侯門當名庫雉與鄭矛盾孔穎達無所折衷  
既言鄭以臯應自是諸侯正法又云名之曰庫雉制之  
如臯應制二兼四特褒周公以傳毛氏子謂詩經聖人  
所刪記出漢儒之手古公非王也於箋有取焉或曰魯  
史書雉門何也曰禮天子諸侯臺門天子外闕兩觀諸  
侯內闕一觀春秋之際諸侯僭王大夫僭諸侯兩觀猶  
僭庫雉可知經因灾以示貶耳書亦言應門何也曰在

周為王門在岐為侯門鄭氏固謂天子諸侯之所同復何疑焉本朝帥藩督府叅用周制其門三重餘二而已儀門之外譙樓巍然以高為貴殆皋門之遺制歟按唐節度使入境州縣築節樓迎以鼓角今遂以是名門其數則節鎮十有二列郡用十著于甲令視漏刻以警昏昕蓋一邦之耳目也廣德為軍名隸江東實隣浙西素號樂土熙寧戊申守臣朱壽昌大脩譙門紫微南豐魯公為之記六十年而燬紹興甲子魏侯安行始再營之

距慶元丁巳復五十四年校傾補陋不可以久會承議  
卽魯侯梟被命分符有絕人之才百廢興舉謂萬乘行  
在吳中郡乃近輔華麗嵯峽當應古義適歲豐人和鬻  
材僦工興役於暮春落成以季夏輪奐之美與創始均  
其外兩亭東以宣詔西以頒春其內兩樓左曰架閣右  
曰甲仗前後映帶粲然一新觀者歎服侯以予與其世  
父原伯先君仲躬同朝相善也不遠二千里請記其事  
惟南豐古文在前婁謝不敢而請益勤姑為考衆說之

異同而識其歲月如此明年戊子三月

萬安縣新學記

學所以明人倫人倫不可一日廢學校其可一日廢乎  
雖然此王政也故凡君國教學為先而世治則制度在  
王虞夏商周皆立大小學于都畿諸侯之國亦必天子  
命之教然後為學者是也世亂則學校不脩禮失則或  
求之野故仕王朝者多有不悅學之說以及其大人列  
國如鄭而青衿不至反朝夕游于鄉之校者是也或疑

論語一書如帝王厯數之授受邦國政事之得失大而  
道德性命之要小而飲食衣服之節罔不及之獨於學  
校畧無問答抑嘗深求其故乎司馬遷曰孔子以詩書  
禮樂教弟子蓋三千焉身通六藝者七十有二人如顏  
濁鄒之徒頗受業者甚衆故當是時或問為邦或問為  
政以至祭祀朝覲征伐會盟治民折獄之類講習之已  
熟切磋之未至往往隨其才器各底于成舉而措諸事  
業斯無難者是則傳道育材不在乎辟雍泮水而在乎



杏壇之上洙泗之間也久矣又何問焉宋興世祖方四  
征不庭已數幸國學欽宗將聖親為之贊列聖繼志首  
善始京師由內及外至於慶厯學校遂徧天下蓋祀先  
聖先師于學古也後世郡國廟事而已復古之制且及  
於邑則起本朝若守與令敢不敬承吉之萬安自熙寧  
五年為縣今將百三十載而學凡三徙士不以為然慶  
元戊午夏四月知縣事宣教郎王牒師道實來政知後  
先首闢龍頭書院遂議新學相方視址捐直與民得地

二十餘畝以明年三月壬子僞工盡十月而殿宇學舍  
皆成經史之閣左右生之齋內之庫帑庖湑外之門閭  
垣墻邃深爽塏幾亞郡學費緡錢以萬皆士人所樂輸  
而官以餘則助之且為經畫悠久贍給之計纖悉無遺  
往來者但視其成而不知其所以成也諸生請記其事  
某惟夫子教人非可一言而盡其論行藏亦豈一端而  
止然必學成乃許以仕故說漆雕開之對而惡夫賊費  
宰之佞豈嘗使人以政學也哉粵自王道衰而異端作

霸者之後有楊墨楊墨之後有縱橫有申韓有黃老有諸儒之專門至漢唐以來又設科目以取士士方拘牽時文或不得一意於學今國家開設學校惟周孔之教是明惟堯舜文王之道是適為士者雖藉舉業為入仕之階然平居父詔其子兄詔其弟自洒掃應對而充乎孝弟忠信由聞見卓約而極乎高明光大蘊諸中者既不為淫辭詖行所汨則形諸外者亦何適而不可故施之試程非駁雜之辭進為師儒得範模之正臨民則為

良吏立朝則為名臣舉不出乎素學于以副治世化民  
成俗之德意此則賢令承流宣化孜孜徙學之本心也  
可不勉歟若夫江山之勝棟宇之脩與夫竹木工役之  
多寡宣勞協力之名氏令也能文自詳記於碑陰此不  
復云六年庚申正月旦

墨池閣記

唐垌字林夫翰林侍讀學士彥猷諱詢之子錢唐人熙  
寧四年上書合時宰意用臺荐驟得御史裏行明年三

月擢諫官八月復越班論時宰責筦庫廣州徙監吉州  
太和縣鹽酒稅自公退食學書于官廨池上後數年山  
谷黃公為令賦絕句云攀檻朱雲頭欲白不知流落向  
何州空餘前日學書地小閣紅蕖取意秋元祐中蘇文  
忠公守杭林夫適赴武昌公得其父舊詩次韻送行有  
聞道黃門有父風之句謂父子皆善書也今今朝奉郎  
卓洵涖事三載每葺縣庠增置博士弟子員通四十人  
教養課試一視侯類左序東偏接林夫廢廨故沼尚存

乃闢其地創闢三間為諸生游息之所用漢張芝故事  
榜曰墨池著其學書之美請予為之記夫書雖一藝古  
人猶不苟如此推而上之進德脩業豈止收翰墨之功  
而已或謂林夫進銳退速亦可取乎予曰吾夫子有言  
不得中行而與之必也狂狷乎林夫少年時雖異乎中  
行要非碌碌之士故陳襄述古荐之於經筵而山谷追  
美於已去之後蘇公復以詩贈別至卓令又表而出之  
學者其知所擇哉山谷以元豐三年庚申得太和辛酉

歲方上絕句題十一月己卯蓋壬戌年是月二日也又  
明年十二月移德平鎮而去迨慶元庚申兩甲子矣三  
月庚辰周某書

贛州贛縣重脩學記

皇朝立學徧郡縣縣有附庸有支邑人之言曰支邑距  
城近者百里遠則倍蓰賦租征權間得移用學校之脩  
既已非艱而其士又以城闕為遠故庠聲序音日振於  
一邦附庸則不然賦租征權守皆統之士方萃於郡庠

為令者因得藉口學校名存實否人亦不責備也慶元三年冬奉議郎司馬邁來為贛宰深闢其說謂郡庠教養率限以員今十室必有忠信而曰一同無遺賢誣其下也上臺戒橫歛州家不科取邑之財用有定名或漁於吏或費於侈而曰力不及於學誣其上也民之師帥當如是乎於是節用度核隱欺首葺大成殿次飾講堂齋舍凡重門脩廊下至庖湢之所器用所須無一不備舊廩歲輸米二百斛緡錢僅以百計經營三載括六



鄉閒田之所入益錢至三倍既有養士之費則請於州  
還補生員請食於學月書季考一守成規春秋奠獻如  
式文風郁然遂為外邑之表代更有日書來請記予聞  
記有二說不贊聖人之道則勉諸生以學昔在皇祐賢  
令大理寺丞王希肇正廟學太山孫復碑記其實謂夫  
子道被萬世非假稱述逮嘉祐中著作佐郎錢顓尤號  
賢令學政益脩每以上之教化士之講習告諸人臨川  
胡彖大書碑陰即而讀之思過半矣予尚何言姑舉司

馬君之說附先賢之後使來者知溫國曹緒為政如此  
非俗吏所能為也尚嗣音俾勿壞六年十月旦

梅州重修學記

南海屬郡潮為大潮之屬邑程鄉為大五季偽劉升其  
地曰敬州國避今祧廟諱以梅易敬熙寧癸丑嘗歸潮  
後十年復初紹興丁巳如纔三年又復甲子適周矣雖  
曰僻在嶺表而自唐元和末韓文公守潮首置鄉校謂  
刺史縣令不躬為之師命趙德督生徒程鄉秀民固在

其中至元符初垂三百年劉忠定公又謫於梅每謂語  
不妄然後可入於誠諄諄誨學者蓋天以兩賢加惠茲  
土舊矣故其士醇其民樸葺學校以教之尤不可已異  
時二千石自四遐相易而至土風未遽知政事未易脩  
凡所設施多在累月之後幸無移徙牽制安意營職亦  
不過期月已迫合符正使心乎教養而為之也難今劉  
侯則不然侯潮人也梅治程鄉猶本郡也初仕即尉此  
習知其風俗周知其財用况大父伯父再世登科故崇

儒之心切而為政之力易下車以慶元五年之仲冬越  
明年閏春之朔即增飾學宮新十哲像徧續從祀凡齋  
舍職事位下職庖湍之屬悉加於舊廣學田增生員別  
創小學四齋絃誦之聲日聞前守陳自脩始以忠定公  
配享文公至是各為之祠以瞻以儀厥仲夏告朔合僚  
佐衿佩二百人慶其成於是教授林陶掾曹姚得明程  
鄉令李昌齡歌詩三章章十句以美之一章頌侯之來  
榮也二章樂庠序之新也三章欲人才之興也其歌曰

孰不為邦孰守其鄉如被錦衣晝行輝煌侯曰上恩曷  
敢弭忘何以報之俾民向方言葺泮宮于鄉有光載歌  
曰宣聖南面珠旒袞章十哲脩坐郡賢績廊六齋分列  
小學時傍談經議道春祠秋嘗我侯戾止率由典常又  
歌曰閭閻諸生振鷺來翔詩書禮樂游息脩藏勉爾行  
業為時俊良毋毀於隨毋嬉以荒三歲大比用賓于王  
歌既闌僉曰允哉侔來視予嘉其有美而有勸也併紀  
歲遺之它日與計偕者依鹿鳴歌是詩轉而上聞非此

邦之盛事歟侯名渙字伯順今官朝散郎十月日具位  
梅州貢院記

易曰隨時之義大矣哉時未可為不為可也時既可為  
不為可乎降漢迄唐因郡國大小定貢士多寡本接五  
季之亂鄉舉寂寥士試州治未有圍棘糊名之制由廣  
而東去國滋遠厥初合一路纔貢一士涵養二百餘年  
人才始衆梅之置州適後他邦在法士不滿百併試傍  
郡貢院之不設時也連舉大比至數百人預荐者五或

即郡庠或寓駟亭始苟簡成之終勞費葺之今太守朝散郎劉渙節用儲財肇新試闡亦時也相攸度基廣十有二丈深三十有七丈布竹木龍川擇梓匠於汀巔為廳堂各五間其崇二丈五尺廊屋十四間內外門各五間封彌膳屋總十間隔街有溪限以編戶厚償其直徹而達之洞視山川之秀漢中有百花洲創佳致亭於其上興工以慶元六年六月訖事以十一月丁巳匠以工計者五千有奇雜役則募閒民用磚十萬蓋九倍之錢

以緡計者數千米以斛計者累百越十二月朔行鄉飲  
酒禮發烏程鄉令李昌齡予里人也以書道本末且曰  
州惟一邑向也百役所仰今侯甫脩學校又為是舉成  
規成規定於心餘羨出於州科調毫厘勿及其屬願紀  
實其美恭聞太宗皇帝端拱元年放進士二十八人有  
古成之者預焉雖家廣之增城後徙於梅其四世孫革  
遂登紹聖進士第元符三年監奎繼擢丙科政和二年  
則有劉中紹興十五年復有羅振四隣望之指為士鄉



又況戊申策士維揚而潮人禮部尚書王大寶臚傳第  
二於梅本同州丁丑奏號南省而惠人秘書郎張宋卿  
名冠淡墨於梅為同路兩賢學問過人而立朝持論並  
為當世所稱詩不云乎高山仰止景行行止諸生他日  
取魏科繼前脩尚毋忘二千石作成之德明年正月具  
位周某記

文忠集卷五十八